

Här Fernand Etgen  
President vun der Deputéiertechamber  
19, um Krautmaart  
L-1728 Lëtzebuerg

Lëtzebuerg, den 20. Juni 2022

Här President,

esou wéi d'Chamberreglement et virgesäit, bieden ech Iech, dës parlamentaresch Fro un d'Madamm Familljeminister weiderzeleeden.

Am Kader vun den Tripartite-Verhandlungen Enn Mäerz gouf vun enger Gewerkschaft an och vum Konsumenteschutz ee Gel vu verschiddene reglementéierte Präisser, ënner anerem vun den Tariffer an Alters- a Fleegeheemer, gefuerdert. Dës Fuerderunge goufe vun der Regierung awer net opgegraff. Am Hibleck op déi exorbitant Inflatoung, déi am Ablack d'Liewe vun de sozial schwache Leit an den Alters- a Fleegeheemer virun eng Zerräissprouf stellt, hunn déi Alters- a Fleegeheemer, deenen hir Investitiounen zum gréissten Deel vun der ëffentlecher Hand finanziert ginn, eng sozial Verantwortung wéi nach seele virdrun.

An deem Kontext hunn ech folgend Froen un d'Madamm Minister:

- 1) Ass d'Regierung der Meenung, datt am Hibleck op déi dramatesch inflationär Lag, an där sech eist Land befënnt, déi staatlech kofinanzéiert Alters- a Fleegeheemer keng Erhéijunge vun den Tariffer a Prestatiounen erhiewen dierfen, soulaang et keng entspreichend Erhéijunge vun de Rente gëtt?
- 2) Wann nee, wat fir Mesurë gedenkt d'Regierung ze huelen, fir deene Leit ze hëllefen, déi duerch d'Inflatoung net méi d'Méiglechkeet hunn, déi erhéicht Tariffer a Prestatiounen ze bezuelen an deenen hir Ënnerstützungsfro beim Fonds National de solidarité ofgeleent gouf?

Mat déiwem Respekt,



Fred Keup, Deputéierten

